

इक बड्डी कामयाबी तैहत जम्मू-कश्मीर ते हरियाणा पुलस दी टीमै इक सांझे अभियान तैहत फरीदाबाद थमां बड्डी मती मात्तरा च हथियार-असलाह ते गोलाबारुद बरामद कीता ऐ। इस बारे मीडिया गी जानकारी दिंदे होई फरीदाबाद दे पुलस कमीशनर सतेन्द्र कुमार गुप्ता होरें दस्सेया जे एह कारवाई जम्मू-कश्मीर ते हरियाणा पुलस दी सांझी कारवाई ऐ- जेहदे तैहत इक गिरफ्तारी बी कीती गई ऐ।

उनें अगो आखेया बरामद कीती गेदी चीजे च बंदूका, मैगज़ीना-टाईमर- बैटरियां ते 360 किलोग्राम तौले अग फगड़ने आला पदार्थ शामिल ऐ।

<><><><><><>

## By Polls Arrangements

नगरोटा ते बडगाम विधान सभा हलकें च कल होने आहले उपचुनाएं आस्तै सब्भै तयारियां पूरी करी लैतियां गेदियां न। इनें महत्वपूर्ण चुनाएं लेई प्रचार ऐतवारें संजा खत्म होई गया- जेदे च नगरोटा च 10 ते बडगाम च 17 मेदवारें मतदाताएं अगो अपनी आखरी अपील कीती। अधिकारियें भारतीय नागरिक सुरक्षा संहिता दी धारा 163 तैहत पाबंदियां लागू करी दितियां न- जेहड़ियां मतदान शा पैहले 48एं घैंटें दी मौन अवधि गी ध्यानै च रखदे होई लाईयां जंदियां न। अधिकारियें दस्सेया जे इनें उपाएं दा मकसद सार्वजनिक बवस्था बनाई रखदे होई ते आदर्श आचार संहिता दी पालमा करदे होई स्वतंत्र- निरपक्ख ते शांतिपूर्ण चुनां यकीनी बनाना ऐ। वोटें दी गिनतरी 14 नवम्बर गी होनी ऐ। तोंआई एस.एस.पी. जम्मू जोगिंदर सिंह होरें नगरोटा विधानसभा उपचुनां लेई कीते गेदे सुरक्षा इंतजामें दा जायजा लैता।

<><><><><><>

## Satish Sports

खेडु ते युवा मामले दे मंत्री सतीश शर्मा होरें आखेया ऐ जे सरकार जम्मू-कश्मीर चे खेडुं ते युवा प्रतिभागियें गी ब्रढावा देने आस्तै पूरी चाल्ली वचनबद्ध ऐ ते इत्थे उपलब्ध खेडु ढांचे दा दर्जा बधाना- भलेया- अज्जै-कल्लै दियें सुविधाएं गी जोड़ना- बेहतर सिखलाई ते कोचिंग उपलब्ध कराना- जनेए कम्म सरकार दियें तरजीएं च शामिल न- तां जे इत्थूं दे नौजवान खडारियें गी खेडने ते अपनी क्षमता च होर नखार आहनने लेई बेहतर सुविधां ते साजगार म्हौल उपलब्ध होई सकै।

कल बारामुला च सोपोर दे चन-खान स्थित खेडु मैदान दा दर्जा बधाने दे कम्मै दी शुरुआत करदे होई मंत्री होरें घोषणा कीती जे खेडुं च शानदार प्रदर्शन करने आहलें गी सरकारी नौकरियों च तरजीह देने बारे नियम जारी करी दिते गेदे ना। उनें आखेया जे खेडडां नौजवानें दी ऊर्जा ते क्षमता दा स्टेई ते पूरा – पूरा इस्तेमाल करने दा मौका प्रदान करदियां ना।



## Pashmina Fest-2025

जम्मू-कश्मीर दे सगोसार दस्तकारी विरसे गी बढावा देने दे मकसद कन्नै कल कटड़ा च त्रै-रोजा पश्मीना उत्सव 2025 शुरु होआ- जेहदा लम्मे चिरे थमां इंतजार हा। उद्योग ते बपार मैहकमे दे कमीशनर सैक्रेटरी विक्रम जीत सिंह होरें जम्मू-कश्मीर बपार उत्थान संगठन JKTPO आसेया आयोजित इस उत्सव दा उदघाटन कीता- जिसी केन्द्री कपड़ा मंत्रालय नै प्रायोजित कीते दा ऐ। इस पश्मीना उत्सव च कठुआ ते श्रीनगर दे पश्मीना उत्पाद गी दिक्खने ते बिक्री लेई रखेया गेदे- जिनेंगी जी.आई. टैग हासल ऐ।



## Doda Vande Matra

भारत दे राष्ट्री गीत वंदे मातरम दे 150 बरे पूरे होने दे सिलसिले च मुल्ख भरै च चलै करदे बक्ख-बक्ख चाल्ली दे आयोजन दे इक हिस्से दे तौरा पर कल जिला पुलिस लाईन्स डोडा च राष्ट्रगीत गाने दा इक कार्यक्रम आयोजत कीता गया- जेहदे च पुलसकर्मियों-विद्यार्थियों ते होरनें केई लोके हिस्सा लैता। इस मौके सारें गी किट्टे होइयै- एहदे च हिस्सा लैने कन्नै एकता- देश प्यार- सम्पूर्ण भाव ते राष्ट्रभक्ति दे जज्बे दा शानदार नजारा दिक्खने गी लब्बै रदा हा।

इस मौके पर एस.एस.पी. संदीप कुमार मेहता होरें इस पैहल दा सुआगत कीता ते एहदे च हिस्सा लेइयै देश प्यार दे जज्बें दा इजहार करने आहलें सब्भनें प्रतिभागियें ते आयोजन च शामिल हितधारकें दी सराहना कीती। उनें आजादी दे संघर्ष दौरान इस गीत दी सब्भनें गी इक-जुट करने च भूमिका गी उजागर कीता। उनें सब्भनें लोके-टकोहदा करियै-नौजवानें गी अपील कीती जे ओ देश प्यार दे जज्बें गी बनाई रखने- राष्ट्र निर्माण च योगदान देने- रमानदारी सदभाव ते भाई-चारे आहलियें कट्रें गी अपनाई रखने- एकता अखंडता ते अनुशासन दे नियमें पर चलने ते भारत दी सगोसार सांस्कृतिक विरासत गी मजबूत बनाने च योगदान देने दा आह्वान कीता।

<><><><><><>